



Inuit Ataqaṭigiit sinnerlugit Inatsisartuni ilaasortaq  
Olga P. Berthelsen

**Nioqqutissanik pilersuineq pillugu § 37 naapertorlugu apeqqummut nr. 2011-135-  
imut akissuteqaat**

Asasara Olga P. Berthelsen

Inatsisartut suleriaasianni § 37 naapertorlugu apeqqutinik imaattumik  
saqqummiussaqaqputit:

1. 2012-miit nunaqarfiit avinngarusimasullu kiffartuussineq tunngavigalugu nioqqutissanik pilersorneqarnissaat eqqarsaatigalugu, Naalakkersuisut isumaqatigiinninniarnermik aallartitsererpat?
2. Isumaqatigiissutip maanna atuuttup imarisaa eqqarsaatigalugu, KNI-p sullissinera naammaginatsumik naammassineqarsimava?
3. Aningaasanut Inatsimmi kontomut 73.01.14-mut oqaasertaliussat tunngavigalugit, Naalakkersuisut piginneqatigiiffinnut allanut, kiffartuussinissamik isumaqatigiissuteqarsinnaapput, tamanna inuiaqatigiinnut iluaqutaassappat, aammalu isumaqatigiissuteqarfigineqartoq suliassamik kivitsisinnaappat. KNI-p saniatigut misissorneqarnikuua, ingerlatseqatigiiffimmik allanik suliassamik kivitsisinnaasoqarnersoq?

Apeqqutinnut tunngatillugu imatut ilisimatitsissuteqarsinnaavunga:

1 pillugu. 2012-imiit nunaqarfiit isorliunerusullu nioqqutissanik pilersorneqarnissaannut kiffartuunneqarnissamik isumaqatigiissusiornissamut Naalakkersuisut KNI isumaqatigiinniarfigalugu aallarereerpoq.

2 pillugu. Naalakkersuisut isumaat malillugu KNI-p kiffartuussinerup qaffasissusissaa, kiffartuunneqarnissamik isumaqatigiissummi aalajangersarneqarsimasoq naammassisinnaavaa.

Sapaatit akunnialunnguisa matuma sionatigut Upernaviup eqqaani nunaqarfinni amigaateqalernermit tunngatillugu ilisimatitsissutigisinnavara, KNI nioqqutissanik timmisartukkut nassiussiniarluni misilissimagaluarmagu. Kisiannili sila teknikkilu pissutigalugit Air Greenland nioqqutissanik timmisartuussinissamut periarfissaqarsimangilaq. Taamaattumik iluatsitsinerliorerit arlallit pissutaallutik najukkani Pilersuisup pisiniarfii inuussutissanik nalinginnaasunik nunguutsisarsimapput.

KNI-p kiffartuussinerata qaffasissusia ataatsimut isigalugu isumaqarpunga, KNI-mut akiliutaasartut tunngavigalugit tamatuma naliliiffigineqarnissaa pingaaruteqartoq.

04. juli 2011  
Sagsnr. 2011-052075  
Dok. Nr. 671903

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: iaan@nanoq.gl  
www.nanoq.gl

Namineerlutit oqaatigisattut Namminersorlutik Oqartussat 2011-mi 37 mio. koruunik akiliisussaapput. Aningaasat suliffeqarfiup pisiniarfinnik 60-70-inik ingerlataqarneranut, taakkunangalu amerlasuut tapiissutitaqaratik ingerlanneqarnerminni iluanaarutaasinnaanginnerannut sanilliunneqassapput. Tassalu Namminersorlutik Oqartussat pisiniarfimmut ataatsimut tapiissutigisartagaat amerlavallaangillat. Tamatumuunakkut oqanngilagut, KNI-mut piumasaqaateqassanngitsugut. Akerlianik Naalackersuisut suliffeqarfimmut, ulluinnarni aammalu kiffartuunneqarnissamik isumaqatigiissusiornermi annertuunik piumasaqaateqartarput. Kisiannili akiliutitta sullinneqarnittalu akornanni ataqatigiinnermik isiginninniartuarnissarput pingaaruteqarpoq.

3 pillugu. Nioqqutissanik pilersuinermi kiffartuunneqarnissamik isumaqatigiissutit ammasumik neqerooruteqartitsivigineqarnissaat Naalackersuisut isumaliutigisimavaat, atorniarnaguli aalajangersimallutik. Tamatumunnga pingaartumik nioqqutissanik pilersuinerup patajaatsumik ingerlanneqarnissaata eqqarsaatigineqarnera pissutaavoq. Tassalu sullissisup isumaqatigiissusiorfigineqartup sumiiffinnut angisuunut, taamatullu sumiiffinnut mikisunut sullissinermik naammassinnissinnaanissaa pingaaruteqarpoq, taamatullu isumaqatigiissutip ikerinnaannakkut taamaatinneqannginnissaa pingaaruteqarluni.

KNI-p suliassaq ukiuni arlalissuarni suliarisimammagu, tamatumalu kingunerisaanik sumiiffinni kiffartuunneqarnissamik isumaqatigiissutissanut ilaasussani pisiniarfeqarami siaruarterinermilu attaveqaateqarluni, KNI sullissisunut, neqerooruteqarnissamik kissaateqarsimasinnaasunut allanut sanilliulluni arlalitsigut iluaqutissartaqarpoq. Sullissisut allat pisiniarfinnik siaruarterinermilu attaveqaatinik pilersitseqqaartussaapput, tamannalu pilersitsinermut aningaasartuuterpassuarnik kinguneqartussaavoq.

Tamatuma peqatigisaanik aningaasat, kiffartuunneqarnissamik isumaqatigiissutip atuutsinneqarneranut KNI-p ukiumut pissarsiarisartagai 2001-imi 67,9 mio. koruuniusimasut, 2011-imi 37 mio. koruuninut apparsimapput. Taamatut ineriartortitsineq Nunap Karsianut iluaqutaavoq, kisiannili aamma ukiuni qulikkaani kingullerni ingerlatsinerup ingerlaavartumik pisariillisaavigineqarneranik kinguneqarsimavoq. Taamaattumik kiffartuunneqarnissamik isumaqatigiissummi maannakkut atuuttumi piumasaqaatit, soorlu nioqqutissanut tunngaviusunut ammatitsinissallu sivikinnerpaaffissaanut tunngasut ilaat Namminersorlutik Oqartussat piingippatigit sullissisussaq nutaaq erngerluni pitsanngorsaanerme, pilersitsinissamut aningaasartuutitut taarsiiffiusinnaasunik iluanaarutissaqanngilaq.

Sullissisussat allat pileritsatsinneqarnissaat kissaatigineqarpat, kiffartuunneqarnissamik isumaqatigiissutip isumaginissaanut akiliut qaffanneqartariaqartoq, imaluunniit aamma kiffartuussinissap qaffasissusissaannut piumasaqaatit appartinneqartariaqartut, taamaalillunilu sullissisup nutaap aningaasaliissutigisaasa naapertuuttumik erniortinneqarsinnaanissaat anguneqarsinnaalertariaqartoq naliliisoqarpoq.

Taamatuttaaq kiffartuunneqarnissamik isumaqatigiissutit distriktikkaartumik neqerooruteqartitsivigineqarnerisigut nioqqutissanik pilersuinerup maannakkut piumasaqaataasut atorlugit isumagineqarnissaat pilerinarnerulersinneqarsinnaanngitsut naliliisoqarpoq, tamannalu aamma ilaatigut ilaasunik assartuussinermi takuneqarsinnaavoq. Taamatut aaqiinikkut sullissisut ataasiakkaat pilersitsinermut

anigaasartuutaasa ikilisinneqarnissaat ilimagineqarsinnaavoq, tamatumali peqatigisaanik sullissisup angisuunik ingerlataqarnermi iluaqutissat annaasussaavai. Kiisalu taamatut siaruartitsinermi Namminersorlutik Oqartussat allaffissornermut sulinermit anigaasartuutai amerlanerulersinneqassasut naliliisoqarpoq.

Tassalu ataatsimut isigalugu Naalakkersuisut naliliipput, KNI-mut kiffartuunneqarnissamik nutaamik isumaqatigiissusiornikkut iluaqutissat, pilersuisumik allamik toqqaanermi iluaqutissaasinnaasunit amerlanerussasut.

Saaffiginnissuteqarninnut qutsavigaakkit, neriuppungalu matuma siuliani akissuteqaatiga naammagissagit.

Inussiarnersumik inuulluaqqusillunga

Jens B. Frederiksen